

景

文

集

九



景 文 集
(九)

宋 祁 撰

景文集卷五十二

啓

賀之相公啓

伏審光奉制麻榮持武節伏惟慶慰恭以閣下識諸民極氣函天倪奮謀自將與聖胥會煩使已試素論
僉宜遂階三事之聯造穆萬樞之總巨壘朝閉丙車夕馳一旗麾衆以暫登寸廣嬰賊而還獻迎頒茂冊
卽正家司贊宗祀之上儀揭竝侑之新典百度底定九德敷施爰賴獨賢再休近輔朝謀元帥帝念宗工
祗築齋壇顯受師鉞臨遣前席大撫西人漢家之注意安危竝師舊德吉甫之兼資文武庸式萬邦詎淹
零雨之還竚復秦階之冠祁方勤障候阻飭巾幘瞻朔門墉飛馳鈴府

賀相公啓

伏審光奉制函改疏藩社伏惟慶慰恭以閣下沈謀隱正惇德粹明威會先朝協恭順采萬樞俾乂露金
石之至誠三靈危言摧豺狼之餓喙背憎迭逞身退罔私會正寧之執彊判羣邪而圖舊子文三已曾喜
愠之不形姬旦未歸固室家之同望游更巨屏均暢遠猷茲者北海表封東秦均重再煩坐鎮之德克宣
浹大之風然而人鬱具瞻邦思弼直天將爲鐸埃逾舌之至音政若和羹竚蓀梅之妙味詎屆葦年之報

卽迎三節之趨。大庇含生。永孚久業。

賀集賢李相公啓

伏審肅奉制恩。對司魁柄。伏惟慶慰。恭以集賢相公。慮經萬事。業映九功。曩自先朝。已膺茂宰。去邦不校。則靜若淵淳。會聖有期。則毅然山立。運有夷險。道無淄磷。屬明辟之敷求。眷舊人而圖任。越由藩枳。再序公槐。伏以東山見思。歎還歸之甚晚。南宮所著。留故事以居多。方抃登賢。遽收崇讓。矧佐王之爲重。匪收汗之可期。願體清衷。速膺殊典。載披題誨。但伏眷私。

賀史館相公啓

一作賀富相公啓

伏觀今月十六日麻制。伏審昭備冊恩。入正台府。伏惟慶慰。恭以閣下業總民極。氣陶天倪。自大對清規。安步華掖。詞析醜類。德庇生人。復故約于撫和。屈佳兵于不戰。進幹樞綽。出均賢勞。謀當帝心。功暴方夏。遂膺帝賚之素。入光公孫之求。對執萬機。顯正三事。槐朝表位。慶賢聖之同時。鼎足承君。併安危之注意。至公在位。有識均歡。祁早誤知憐。欽聞命數。乘北障之守。詎敢彈冠。溯西閣之深。情難飛羽。第均紳笏。參仰坯陶。

賀并州安撫相公啓

伏審寵被墨麻。移鎮藩牧。伏惟慶慰。恭以經略安撫相公。神贊忠傑。天基謀謨。坐清叛戎。大造西鄙。進茂

帝綽昭穆彝倫。遂均三事之勞。蒙總中軍之令。堯曰四嶽。實統諸侯。周制上公。亦居二伯。中外雖異。倚注弗殊。但虞桑蔭之淹。復冠槐階之貴。士類攸仰。天下同瞻。祁尙守邊符。莫陪賓贊。心傾德宇。恨不翰飛。

賀文相公啓

伏覩去月十一日。內降白麻。伏審顯奉制恩。式序元宰。伏惟慶慰。恭以閣下忠實天挺。器本國資。蓄爲嘉猷。邁作昭德。自禽繫妖盜。綏靜黎元。講希世之洪儀。浹函區之大霈。協風八律。人有太和。赫日當天。物無斜影。旋委魁柄。外倡方侯。其如簡在之眷。素隆是以還相之期。難久誕告。剛旦復冠乾台。冊賜焜煌。書贊優重。弼惟帝賚。宜體貌之愈加。公自西來。固室家之相賀。永光丕綽。遂格上穹。祁加以餽辱。誤蒙獎錄。遠滯屯鄙。側聽宸音。慶坯冶之在辰。阻巾幘而詣府。欣忭之切。精縕奚宣。

賀南京劉相公啓

伏審懇辭宰柄。出守留都。確請不回。俞音俄降。伏惟慶慰。恭以大觀文相公。照通三極。業茂九歌。感會帝期。彌綸王體。隱含章而內健。藹造辟以進思。七年于今。百度咸乂。功名之地不處。亟露奏封。進退之正有宜。遂申高節。增冬官之茂秩。帖雲殿之祕資。用付南畿。益衍多戶。宗臣舊法。固自著于廟堂。仁人乃心。實不離于王室。鎮息浮動。均一賢勞。祁適剖州符。阻通慶謁。欽懷風矩。參激衿膺。

賀柴相公啓

伏審肅膺明制。改燾近藩。伏惟慶慰。恭以閣下茂德參和。大猷經遠。世嗣廟彛之伐。入連王館之榮。節制中權。耳耳華于六轡。綢繆上袞。煌煌視于三階。執競又新。疇勞彌渥。眷言旬服。移建侯邦。推異數于爰田。實衍封于家稍。僉言旣允。誕告咸聞。何確懇以辭隆。尙留恩而引日。特貽鈞翰。過列謙情。竚卽寵光。方紆勤企。

賀廣信軍武六宅啓

伏審寵正使名。茂光戎轄。守符未改。邊鎖增雄。足下英概自高。沈謀克際。敵上所懷。需勇于餘。積閱有歲。月之淹。薦賢交章。奏之密果。從聖簡。進服恩褒。列帥慰以相歡。中軍倚而增重。攝符無狀。卽席是資。竊抃餘音。回符久禱。

賀李宣徽生日啓

伏以天寶良弼。國仰宗臣。茂協高秋。共欣慶日。恭以臺下資稟忠厚。謀濟沉雄。宜力百爲。同寅一德。生毓在旦。峻極有基。重望元功。久當一面之委。長年雅壽。宜歸千歲之延。卓冠朝塗。永光王府。祁官難離。次地卽富隣。躬詣莫諧。禱祈增萬。

謝生日餽物啓

叨塵從籍。倫比儒紳。私記所生。內惟永感。而台造垂記。慶問下馳。牢牽在庭。薰劑凝器。副之仙繪。申以齋

醪。惟山木之有才。況樞轡之且老。仰蒙善祝。俾永天年。願依誕鑄之餘。更奮庭殘之氣。丹膺內刻。訥語難宣。

上王尙書啓

祁八月末到都。臥家養疾。得不事事。故羸瘠欣欣有生意。但神疲氣耗。未任趨走。日不遑舍。上恩如天。可勝道哉。不審比來明公百況何似。知深究導養術。塵緣日輕。此僕晚聞道之罪。不得望公藩牆矣。然冀遂進之毋怠。于九德三事亦何所妨嫌云。

上資政尙書啓

祁惶恐。奏記資政尙書執事。葉拱之隔。歲實載華。乃情屬溯。與日參極。郊圻胥接。風謠亟聞。恭承鎮撫餘閒。福祚崇衍。羌零微警。調度少勤。雖京控制。事務彌劇。伏望慎固冲守。綏協善經。徐副民瞻。還步台輔。甄履舊物。他人無實。縷縷懇懇。知所歸庇。不任禱戀之至。不宣。

回青州夏尙書啓

屬者國家以表海仍饑。生緣爲療。鬱其嘉氣。瘼此下民。上深軫于何辜。我實難于共此。得于舊輔。殿是大邦。恭惟尙書道茂協恭。眷深同體。細文卽授。便道按行。包季煎之全區。將仲山之明命。詔書一切。許于便宜。漕舳相銜。資于仰給。永惟賦政。備覲有猷。閭租計之會期。濟流庸之沒振。汙萊故壤。遘及于屢豐。愁嘆

餘音坐成于式舞。不啓後艱之隙。允繄坐鎮之方。續簡帝心。功暴民聽。朝無異論。賞有舊章。遽沐書文。備形謙意。九重歸美。已欽長者之言。四近疇庸。事後富民之拜。感慙所萃。敷釋匪殫。

回晏尙書到任啓

伏自尙書暫辭機軸。近撫藩垣。揭天節以載華。總齋航而右汭。便時叶吉。樹政有經。恭惟天一奧區。鬱華勝里。文壇藉屬。經順拜于宸游。封屋連雲。有望電之故老。式倚神明之化。往敦愷悌之風。何辱謙儀。特貽香咫。篤舊僚之曩誼。露存闕之深情。況切營求。諒非遠復。冀綿綿而存用。副赫赫之攸瞻。披晤尙遙。編摩非述。

賀三司韓尙書啓

伏審光奉制恩。入司邦計。伏惟慶慰。恭以尙書稟天正氣。肖道太和。親逢帝期。進輔皇載。畜自一德。奮爲九功。自引避于機衡。又回倡于方岳。經費之重。咳入寶繁。屈安石東山之高。領張蒼北平之總。納節王府。換秩天臺。聊豐寶路之財。行復符階之貴。參贊于衆。誰不其然。祁夙荷誤知。側聞騰告。欣頌并集。慶候難階。

回諸官爲轉尙書承旨啓

向者。以偕衆成書。擢升左轄。滿年循例。進齒中臺。緣內署之乏員。枉複門之召節。多病在告。懇讓未俞。靜

言衰晏之餘。曷稱凝嚴之拜。此蓋閣下素加優品。仍旣雅游。因成命之已行。借褒言而爲地。敢忘悉力。仰答重知。

回夏尙書南京上任啓

伏承榮纛顯都。肅開上府。道風所被。禮俗載康。恭惟尙書識照聖鄰。謀舍國采。早同寅于成務。游凝績以蕃君。比漢鄧侯。謹信而司籥。爲周申伯。惠直以揉邦。屬信處之云初。顧化成而允賴。猗紆公翰。申貢禮華。永惟萬戶之嚴。聊浹九河之潤。冀逾天祉。翹奉帝咨。佩戢欣綸。一二非述。

回宋尙書啓

比者。伏以尙書輟務樞庭。回光台極。聖期胥運。賢業載熙。罄牢讓以亟聞。留茂恩而羌久。寵紆優答。姑廢雅懷。入對丹塗之嚴。進踐槐階之亞。周言交錫。有埒于告猷。天下居安。更隆于注意。方欣附末。遽辱詒音。銜謙德以斯勞。幸宗盟之永庇。茲焉感躍。實倍倫夷。

又回宋尙書啓

伏審光膺詔綽。參總政機。伏惟慶慰。恭以尙書學際三儀。謀經九德。若時佐聖。讓格舊庸。自命節以歸趨。翊帝樞之宥密。終緣民望。還貳台司。超進七兵之曹。增重三槐之路。俞咨素定。朝野相歡。承尙讓以自陳。頗留恩而引避。并垂緒誨。式履終謙。況敦詔以尋頒。幸雅懷之無固。傾軫對寵。併釋翹誠。

上青州夏尙書啓

伏自尙書上還樞筦。近抗藩麾。順泝長波。鎮臨善部。方欲託飛郵而奏記。私執事以布懷。旋審朱轡。改疏青社。以時便道。靡遑客寢之安。所至宣風。用示簡書之急。頓遙師坐。終曠單函。恭惟視事云初。嚮福咸乂。歌齊之壤。表海成邦。比歲洊饑。斯人失職。蚩蚩土著。寢苦庸亡。淪淪頌聲。鞠爲愁嘆。睿明垂軫。中昃載懷。咨蕭育之名臣。振爽鳩之故俗。報同五月之速。落去細苛。事從一切之宜。仰成咻噢。荒餘攸庇。仁壽可期。我實徂東。諒結姬公之愛。上方倚相。行膺壺遂之求。願保天均。俯對民譽。眷孤生于銜遇。列勤悃以兼常。

上陳州晏尙書啓

伏審祇奉朝俞。取升台坐。伏惟慶慰。恭惟知府尙書文經天極。照洞民彝。入對光華之辰。亟揚久大之業。微言茂藻。賁堯思之安安。嘉話遠猷。贊皋謨之采采。退安吉履。迭守近封。冥物眇之虧成。放道樞之曼衍。冲機潛應。休問自升。逮景風之賞期。進白雲之官紀。露陳賜冕。聊夸六枳之藩。馳執覲圭。行正三槐之位。民瞻久竦。帝賚有聞。祁欽聽除音。叢歡勞府。屬攸箴之有守。邈申慶以難階。傾抃所深。名言非狀。

上許州張相公陳州晏尙書啓

近聽恩制。序進卿聯。列讓靡還。冒榮增愧。伏念某本緣天幸。忝參國均。會聰容之日躋。乏謀猷而譽處。有軒竊祿。不穡餘困。未登攷歲之期。遽濫賞風之典。外譁鄉議。仰累朝猷。敢謂關下錫以公言。與其禮進。絢

書郵之慶間分台舍之餘輝。願佩優評。庶亡祗悔。丹愚萃感。搦翰匪宜。

回賀加尙書啓

嚮以成書。冒榮左轄。茲繇滿歲。進秩中臺。寵過者災必相尋。食浮者人將不稱。惕然自愧。罔或遑寧。敢圖評旦之優。助協朝僉之允。華褻已定。危懼差安。遂繫金石之交。更決桑榆之勝。瞻言厚德。載戢丹衷。

東兗州侍講尙書啓

伏審光奉制恩。進升寵級。伏惟慶慰。恭以尙書業宣。寅亮體叶。允元服榮。牒于三朝。逮華顛而一節。上方向學。延雋老以詳求。緒欲鎮浮。據中庸而易退。出麾東社。紆眷南闈。茲者國家抑畏先猷。振除後咎。辰居勿亟。渙號惟新。眷舊德以同寅。舉徽章而異等。心存王室。重申伯之于藩。禮蔚帝師。邁甘盤之罔顯。絲緇遂布。紳櫨相趨。祁風被慈憐。均聆渥綬。溯龍門而且右。躍螽股以忘疲。卑情無任欣抃之至。

謝留府尙書啓

待罪禁垣。啜風幕府。六符在望。三歲其陰。距容舫之流。坐驚宋遠。遡飛鴻之渚。久疇公歸。結深戀于華軒。耿離惊于疏旆。敢謂留府尙書。乘偃蕃之暇。紆紙筆之精。敷屬善辭。勤經至意。餘光所照。頓忘家蔭之咨。舊物載懷。竊附吾氎之托。題襟佩教。撫已知歸。九旻之宇。寢高千門之鑰。惟謹。願安頤養。仰重眷毗。俟四輔之營求。庇一陶之埏鑄。乃情爲僎。緩頰匪宜。

代鄭公回夏尙書啓

茲者。祇荷朝綸。賜停機柄。進肅天台之務。仍參規廷之華。曠職五期。蒙恩一解。榮非所望。愧不容顏。敢謂尙書敦操有筠。推情悅柏。絢書辭而垂慶。助師錫以申褒。冀訂良箴。益紓多悔。接緒風而猶邈。敷感抱以奚殫。

上判府尙書啓

伏審表海報成。坐躋樂國。申圻分理。進守留京。幕府旣開。彼都何幸。恭惟尙書明謨熙綽。浚德惇元。洊幹機樞。彌忠力而自效。均國勞任。與師濟以和衷。靈龜在中。喻馬忘累。雖復勉班春而振乏。大庇物于屢豐。出乃緒餘。同人憂樂。賞圖尤異。聊襲冕以露華。地直鬱葱。果錫圭而委重。惟泰宇之先定。非外物之屢遷。今茲偃蕃。是均倚相。宣尼之懷吾黨。尙念斐成。周人之詠我公。固應信處。願孚百順。俯協四時。浹河福以并蒙。迓變聲之歸止。早應評卷。今宿官司。撫舊集歡。倍百聳等。

賀樞密侍郎生日啓

伏以積善所憑。愛啓莫京之冑。元精發粹。用生名世之賢。紀六矢之初辰。續百金之雅壽。恭惟侍郎選言復實。惇德浚明。包民極以佐王。又天樞而圖國。載生流慶。方賴于壯猷。延祝佑歡。輒修于薄贊。庶宣勤悃。具別封。

上蔡副樞生日啓

高嶽極天。本慶基而憑厚。右賢名世。屬聖旦以挺生。歷載誕之嘉特。仰有猷一僞輔。竝均善禱。式美如仁。恭惟閣下。惠迪人彝。參和國綈。翊聲明于義。如濟文軫于蒙中。約矢射方。遂符于夙志。累茵稱壽。更慶于慈顏。願滋苞竹之榮。寔啓和梅之業。輒茲菲贊。聊侑歡悵。已具別幅啓聞。

上李都尉王都尉啓

伏審肅奉明恩。改書近社。伏惟慶慰。都尉機靈敏裕。履尙詳華。貫九類而有猷。服千齡而逢聖。聯姻沁館。燭照于天潢。接龍韓壇。總提于師節。乃神在宥。進律推榮。清明之朝。聿伸于誕告。蕃宣之寵。洊易于師封。尤協羣言。猶煩確讓。願時膺夫茂典。用增煥于中權。過沐公涵。但銜謙德。

賀安撫龍圖啓

伏審進膺禁城。出撫价藩。終安列邦。總護諸將。吉音騰驛。公議同咨。恭惟安撫國器閎通。辰猷幅臆。雖全盛德。自結上知。向屬河朔無年。縣官勤餉。遴擇髦譽。經制賦財。振匱爲豐。化愁而忭。萬倉之粟知斂。八府之錢不流。擢參從車。用待明制。丕績益奮。華寵亟臻。果因墀地之趨。入直河圖之祕。遂傳一面。分控北邊。雲屯百成。已豫歡于美教。縵胡萬旅。方傾聽于先庚。第資郤縠之中軍。階嗣平當之茂宰。祁早聯朋。褻今託隣光。仰波之餘。執柯不遠。載惟欣偃。何喻端倪。

賀宋安撫啓

上閣祕嚴。北邊控撫。竝華使領。允協朝餼。安撫才勇挺資。機鈴濟美。擢財少府。尙龍羣貨之貿遷。持節朔陲。盡得藩渠之要領。入敷課目。啓沃宸聰。果延郁穆之慶。遂副綏安之重。況緣雅契。尤慰私悰。方安步于亭衢。枉移文于書舍。謙勤可復。欣感相并。

賀宮師杜相公啓

伏審茂膺明制。進冠崇聯。伏惟慶慰。恭以閣下天挺方嚴。道卑冲厚。早服休運。晚躋柄司。種厥德以惇明。蕩他腸之悞惡。功在鐘鼎。言留典謨。所以奮堂上之奇忠。宜盡瘁。然後謝人間之務。誼不苟貪。有識凝咨。當陽欽美。雖几杖自便。而典冊再光。悉俸于官。卽家爲府。帥臣之位一品。弗辜愈榮。君子之壽萬年。在閒彌佚。賢哲相望。今古幾何。祁夙預洪鈞。側聆異數。顧邊符之有守。溯林廈以方遠。滋喜所并。臨文奚喻。

上省副張中庸啓

被教以老夫久疾。特賜存慰。何感如之。僕苦寒瘡。幾三旬不能止。今惟耆度裏衰骨。以疲神耗氣守之。但未及死耳。比來似小勝。然未得平疆。手足酸重。令諸兒相扶持。方得履地。恐因此遂不能爲完人。天以此俾僕早還丘園耳。凡藥補之。過暖則躁而遽。近溫則紆而不切。單劑毒品。又不敢徼幸。此最難爲調適。是以淹臥至此。應數奇致然。來問丁寧。故一二具至。乍省局事約。吏詳甚善。順時愛攝。

賀大名王相公啓

伏審茂膺恩冊。進拜齋壇。伏惟慶慰。恭以閣下上哀宗工。華顙舊德。歷相二后。交穩萬樞。驩假安安。簡上心而有素。羣言謬謬。滿天下而罔私。久偃藩維。頗均賢逸。而北門須屏。中宸慎嘯。猥紆茂宰之僉。回傾元戎之制。疏榮曹社。坐鎮魏臺。抗大旆之悠悠。肅使駢之耳耳。晉卿作帥。竝推卻穀之賢。漢相臨屯。益竦呼韓之畏。永言作翰。式埒銘勳。祁早庇洪鈞。欽聆渥典。阻翹材之伸慶。望驅轡以馳魂。歡緒愧悰。參并無喻。

上龐相公啓

伏審亟露需章。上還宰柄。義當均逸。恩許偃藩。羣望悵然。有道欽止。恭惟閣下才爲世挺。運與聖偕。嚮敘西戎。入陪右府。翊戴丕后。勤勞王家。遂回樞省之嚴。聿冠乾台之貴。南洗蠻霧。近盪隴氛。太羹和而旣平。九鼎隱焉增重。茂勳方顯。勇退自高。或罪或知。固顯仲尼之道大。何喜何慍。益知令尹之德全。聊倡方侯。行歸冢席。祁早依堦冶。今屬扞城。侍材閣以未辰。吮禿毫而無緒。企戀之極。一二奚宣。

景文集卷五十三

啓

上許州太師相公啓

伏以黃圖近輔。陪壤天居。層極貴台。冠儀侯服。沛河靈而并潤。歸鼎重以參和。百順具臻。庶工肯慰。恭惟太師相公。業宣暇假。慮入幾神。副師尹于民瞻。本孝侯之天賜。凝華協帝。實相清明之初。敷哲保身。不處功名之地。亟均賢事。暫殿翰蕃。冥物畛以外齊。據道環而中應。然而商家舊學。素有待于甘盤。漢幄宗臣。難從游于松子。諒須旦暮。再秉機衡。眷踰屢之緒餘。倚歲霖以休澤。縷縷所祝。呐呐匪宜。

上西京留府太師相公啓

伏審改持命節。移總留都。伏惟歡慶。恭以閣下道冠民彝。業熙帝綽。武以摧元惡之漸。文以佐大化之成。暫均夙勞。益儲鉅望。上心攸眷。褒冊俄頒。輟西洛之保釐。委北門之鎮撫。介圭卓馬。方修覲于帝闈。九鼎長城。已懽威于敵國。不待期月。諒促召裝。且還冠于霄階。用永安于廟社。衰殘無狀。挺播焉依。

賀大名太師王相公啓

伏審茂膺制命。兼踐宰司。伏惟慶慰。恭以太師相公。感會二儀。惇崇九德。躬負日月。以啓于大明。神合著